

Islamska braćo i sestre,

O srcem i razumom obdareni,

Osjetimo i promislimo riječi Uzvišenoga Gospodara i plemenitoga Poslanika:

I kad najavi Gospodar vaš: "Ako budete zahvaljivali, sigurno ću vam uvećati; a ako ne budete zahvaljivali, uistinu, kazna Moja je žestoka." (Kur'an Časni, sura Ibrahim, ajet 7.)

"Ko od vas osvane siguran u svojoj kući i porodici, zdravoga tijela, posjedujući dovoljno hrane za taj dan, kao da mu je, ama baš čitav dunjaluk, dat." (hadis Muhammeda, alejhi selam, bilježi Buharija)

Braćo i sestre,

Razmislimo više o onome što imamo, a ne samo o onome što nemamo. Tada ćemo vidjeti koliko samo imamo.

Budimo zadovoljni. Budimo zahvalni. Budimo iskreni i pozitivni.

Viđaj onih izbjeglica. Bez doma, porodice. Nesigurni. Nezbrinuti. Nekad bijasmo isti. Deverali. Svašta preko glave prebacili. Pa nas Allah sačuva, podiže i opskrbi. Allah Uzvišeni!

Budimo zadovoljni onim što imamo, pa ćemo biti bogati. Osjetit ćemo rahatluk i sreću. Jer, zadovoljstvo je najveće bogatstvo. To je riznica i sehara koja se nikada ne troši. Pozitivan stav koji nas namah i uvijek čini radosnim i raspoloženim.

Ko nije zadovoljan, džaba koliko kod imo', vavik mu nešto fali, ne štima. Ma, ne osjeća se dobro.

Ko ne zahvaljuje, osili, udalji, izgubi se. Samo je pitanje vremena.

Ko je negativan, sebe najviše muči.

A da bi sačuvali ono što imamo, imali više i dobili ono što nemamo, trebamo biti zahvalni.

Zahvalni u svome srcu, svojim riječima i svojim postupcima.

Budimo iskreni. Prema sebi. Prema drugima. Skinimo maske. Rasteretimo se. To breme otuđenja, nepovjerenja i zatvorenosti pogađa nas najviše. Dođimo, da bi nam došli. Vjerujmo, da bi nam vjerovali. Otvorimo, da bi nam se otvorilo.

Vratimo se svome Gospodaru. Nahranimo dušu. Otresimo nemar. Budimo hrabri.

U srijedu je lijepo postiti. U četvrtak na sabah, bajram i u petak na džumu namaz u džamiju i džemat otići. Boga Jednog veličati. Za kurbane se pobrinuti. Zavadu ostaviti. Porodicu darovati. Rodbinu, komšiju i ahbaba zijaretiti i prozvati. Hastu i muhtača pomoći. Kaharnog obveseliti. Svojih umrlih, svoje domovine i ummeta muslimanskoga se dovom sjetiti.

Svim džematlijama i muslimanima u domovini, dijaspori i svijetu želim da nadolazeće mubarek dane dočekamo zadovoljni, zahvalni i pozitivni, u Božijim blagodatima sigurnosti, zdravlja i nafake,

Hadži/Kurban bajram šerif mubarek olsun!